



Broj: KSI-09-131/24

Datum: 24.05.2024. godine

Na osnovu člana 25. tačka (g) Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“ broj: 04/21) i člana 25. stav (2) Poslovnika o radu Komisije za odlučivanje o sukobu interesa, postupajući po neanonimnoj prijavi od 13.05.2024. godine protiv K. A., direktor JP „Komunalno Brčko“ d.o.o. Brčko distrikta Bosne i Hercegovine, kao nosioca javne funkcije, na 89. sjednici održanoj 24.05.2024. godine, donosi

## ODLUKU

Postupak za odlučivanje o sukobu interesa protiv nosioca javne funkcije, K. A., direktora JP „Komunalno Brčko“ d.o.o. Brčko distrikta Bosne i Hercegovine, neće se pokrenuti, obzirom da iz prikupljenih podataka i dokumentacije ne proizilazi da je u postupanju nosioca javne funkcije došlo do povrede odredaba Zakona o sprečavanju sukoba interesa u institucijama Brčko distrikta Bosne i Hercegovine, odnosno postojanja sukoba interesa.

## Образложење

Dana 13.05.2024. godine Komisija za odlučivanje o sukobu interesa zaprimila je neanonimnu prijavu broj: KSI-09-131/24, radi sumnje na povredu odredaba Zakona, odnosno postojanje sukoba interesa protiv K. A., kao nosioca javne funkcije, direktora JP „Komunalno Brčko“ d.o.o. Brčko distrikta Bosne i Hercegovine.

Naime, u prijavi je navedeno da je K. A., direktor JP „Komunalno Brčko“ d.o.o. Brčko distrikt Bosne i Hercegovine prisustvovao: danu logoraša ispred JP „Luka“ Brčko 07.05.2024. godine, obilježavanju godišnjice stradanja na mostu Brčko – Gunja 30.04.2024. godine, obilježavanju Dana šehida u Gornjem Rahiću 15.04.2024. godine i podjeli iskaznica novim članovima SDP Brčko u službenim prostorijama. U prijavi je navedena i izjava data za Federalnu televiziju od 31.08.2021. u kojoj K. A. tvrdi da nikad nije bio, niti je član ijedne političke stranke.

Takođe, podnosilac neanonimne prijave zahtijeva od Komisije za odlučivanje o sukobu interesa da utvrdi sve relevantne činjenice, te ukoliko utvrdi postojanje povrede odredba Zakona o sprečavanju sukoba interesa, da primjeni odgovarajuće mjere.

Članom 2. tačka c) Zakona o sprečavanju sukoba interesa u institucijama Brčko distrikta BiH propisano je da je „nosilac javne funkcije“ izabrano ili imenovano lice u organima i institucijama Distrikta, u pravnim licima koje osniva Distrikt kao i u pravnim licima kojima je povjereno vršenje javnih ovlaštenja i lice koje je imenovano, odnosno na čiji izbor i imenovanje suglasnost daje Skupština, odnosno Vlada, ukoliko drugim zakonom nije drugačije propisano.

Nadalje, shodno članu 14. Statuta Brčko distrikta Bosne i Hercegovine propisano je da javni zvaničnici Distrikta, izuzev zastupnika, i članova Vlade distrikta ne smiju biti članovi upravnih ili drugih

odbora političkih organizacija ili učestvovati u njihovom radu i ne smiju dozvoliti da politički stavovi utiču na njihov rad.

Član 54. Statuta propisuje da članovi Vlade distrikta, savjetnici gradonačelnika, šef Policije i njegov zamjenik, direktor Direkcije za finansije Distrikta, direktor Trezora, direktor Porezne uprave, direktor Kancelarije za upravljanje javnom imovinom, koordinator i pomoćnici koordinatora u Kancelariji koordinatora za Brčko distrikt pri Vijeću ministara Bosne i Hercegovine, glavni revizor i zamjenici glavnog revizora Ureda za reviziju i drugi zvaničnici imenovani uz suglasnost Skupštine ne mogu obavljati nikakvu drugu funkciju u javnom ili privatnom sektoru za vrijeme trajanja njihovog mandata ili imenovanja, osim ukoliko nije drugačije predviđeno zakonima Distrikta, kao i dodatna ograničenja u vezi s aktivnostima javnih zvaničnika koje mogu da dovedu do sukoba interesa ili stvore utisak da postoji sukob interesa mogu se predvidjeti zakonima Distrikta.

Član 5. stav (3) Zakona o sprečavanju sukoba interesa u institucijama Brčko distrikta Bosne i Hercegovine propisao je da nosilac javne funkcije za vrijeme obavljanja javne funkcije, koja podrazumijeva rad s punim radnim vremenom, ne može obavljati druge poslove, dok stav (4) istog člana propisuje da izuzetno, nosilac javne funkcije može da se bavi naučnim, nastavnim, kulturnim, umjetničkim i sportskim radom i sticati prihode od autorskih, patentnih i sličnih prava, intelektualne i industrijske svojine, ukoliko bavljenje ovim djelatnostima ne dovodi do sukoba interesa. Članom 5. stav (3) Zakona o sprečavanju sukoba interesa u institucijama Brčko distrikta Bosne i Hercegovine nije propisano bavljenje političkim radom.

Članom 22. Poslovnika o radu Komisije za odlučivanje o sukobu interesa propisano je da je stranka u postupku nosilac javne funkcije.

Uvidom u Registar javnih funkcija i nosilaca javne funkcije, koje vodi Komisija, utvrđeno je da K. A. obavlja funkciju direktora JP „Komunalno Brčko“ d.o.o. Brčko distrikta Bosne i Hercegovine na osnovu Odluke o imenovanju broj: [REDACTED] od 06.06.2023. godine, te je slijedom navedenog obavezan postupati u skladu s odredbama Zakona o sprečavanju sukoba interesa u institucijama Brčko distrikta Bosne i Hercegovine.

Uvidom u dokumente dostavljane od strane JP „Komunalno Brčko“ d.o.o. Brčko distrikt Bosne i Hercegovine broj: [REDACTED] od 16.05.2024., koje smo tražili zahtjevom broj: KSI-09-131/24 od 15.05.2024. godine utvrđeno je da ugovor o radu direktora o zasnivanju radnog odnosa, kao i etički kodeks JP „Komunalno Brčko“ d.o.o. Brčko distrikt Bosne i Hercegovine, ne sadrži odredbe o zabrani članstva u političkim strankama.

Uvidom u dopis SDP-a BiH broj: [REDACTED] od 15.05.2024. godine utvrđeno je da je K. A. član SDP BiH od 22.11.2023. godine, te da ne obnaša nikakvu funkciju u Organizaciji SDP BiH Brčko distrikt BiH, niti je po bilo kojem osnovu vršilac dužnosti u istoj.

Dakle, Statut Brčko distrikt Bosne i Hercegovine zakonodavac jasno propisuje zabranu članstva u upravnim i drugim odborima političkih organizacija, učešće u njihovom radu kao i uticaj političkih stavova na rad javnih zvaničnika. Navedeni članovi Statuta odnosili bi se i na K. A., nosioca javne funkcije, u situaciji kada bi on uzeo učešće u upravnim i drugim odborima bilo koje političke organizacije. Iz dopisa SDP-a utvrđeno je da navedeno lice ne obnaša ni jednu od navednih funkcija, niti je po bilo kojem osnovu vršilac dužnosti u navedenom subjektu, što u konkretnom slučaju znači da nosilac javne funkcije samim članstvom i prisustvom u političkoj organizaciji nije prekršio ni jednu zakonom propisanu normu.

Prisustvo ispred bilo kojeg političkog subjekta u svojstvu građanina, ili člana navedenog subjekta, na manifestacijama koje se održavaju povodom obilježavanja određenih događaja, ne implicira kršenjem odredaba zakona sve dok nosiocu javne funkcije članstvo u političkoj organizaciji ne utiče na obnašanje javne funkcije na koju je imenovan sve dok ne bi bio član upravnog ili drugog odbora političke organizacije čiji je član.

Obzirom na navedeno, a temeljom odredaba člana 14. i 54. Statuta Brčko distrikta Bosne i Hercegovine utvrđena su stanovita ograničenja u obavljanju različitih poslova političkog angažmana javnim zvaničnicima Distrikta, te je utvrđeno da se zakonima Distrikta mogu utvrditi dodatna ograničenja u tom smislu. Bez namjere upuštanja u tumačenje odredaba Statuta, bitno je napomenuti da je Zakona o sprečavanju sukoba interesa u institucijama Brčko distrikta Bosne i Hercegovine, a saglasno Statutu utvrdio dodatna ograničenja pa je tako propisano u članu 5. stav (3) da „ Za vrijeme obavljanja javne funkcije, koja podrazumijeva rad s punim radnim vremenom, nosilac javne funkcije ne može obavljati druge poslove“. Odredbe stava (4) navedenog člana Zakona, preciziraju koji su to poslovi koje nosilac javne funkcije može nastaviti raditi i prilikom obnašanja javne funkcije, no niti jedna od njih ne obuhvata aktivan politički angažman, odnosno rad. Etički kodeks, kao ni zaključen ugovor o radu između poslodavca JP „Komunalno Brčko“ Brčko distrikt BiH i zaposlenog K. A., koju u istom obavlja funkciju direktora, ne propisuju odredbe koje se tiču zabrane članstva u političkim strankama, pa slijedom navedenog imenovani nije postupao protivno odredbama navedenih akata.

Iz svega navedenog, a na osnovu prikupljenih podataka, dokumentacije, kao i uvidom u istu , utvrđeno je da K. A., direktor JP „Komunalno Brčko“ d.o.o. Brčko distrikta Bosne i Hercegovine, kao nosilac javne funkcije, svojim radnjama nije doveo do povrede odredbe Zakona o sprečavanju sukoba interesa u institucijama Brčko distrikta Bosne i Hercegovine, odnosno, da ne postoji sukob interesa, te da nisu utvrđene okolnosti koje bi ukazivale na moguću povredu odredaba Zakona od strane nosioca javne funkcije.

Slijedom navedenog, Komisija je donijela odluku kao u dispozitivu.

Pouka o pravnom lijeku:

Protiv ove Odluke nije dozvoljena žalba, ali se može pokrenuti upravni spor pred Osnovnim sudom Brčko distrikta Bosne i Hercegovine u roku od 30 od strane nosioca javne funkcije.

Predsjednik  
Komisije za odlučivanje o sukobu interesa

---

Admira Mujić, dipl. pravnik

Dostaviti:

1. Neanonimnom podnosiocu prijave,
2. Evidenciji i
3. Arhivi.